

元始天尊說酆都滅罪經

爾時

元始天尊演此滅罪真經告於天靈地祇修齋功德无量召諸天龍地神酆都主者六官掾吏四明公十殿冥官五嶽府君九州城隍

司命司錄五道大神來詣

天尊前集會禮拜於是稽首莊嚴而受約束天尊曰當來果報凡有衆生並是大魔王管攝十惡五逆繫閉牢獄日夜受苦无緣度脫若修十會功德業鏡受記酆都大帝歡喜赦罪人如是七七修齋明作牒狀奏獻上六曹善惡童子抄記玉曆當生快樂之處如修十會功德无量如海廣建道場以報父母深恩悉獲超升淨境爾時  
天尊說斯十會齋功十五名號留傳世間開示愚蒙

- 一七秦廣六王太素妙廣真君
- 二七初江大王陰德定休真君
- 三七宋帝大王洞明普靜真君
- 四七五官大王玄德五靈真君

- 五七閻羅大王最勝耀靈真君
- 六七變成大王寶肅昭成真君
- 七七泰山大王等觀明理真君
- 百日平等大王无上正度真君
- 小祥都市大王飛魔濟慶真君

大祥轉輪大王五化威德真君

天尊告曰衆生父母眷屬當隨地獄死亡之後建修功德善會死魂託生上天不墮惡道流傳國界依教修行拔度亡魂不經地獄如修道教功德无量隨罪輕重各受果報或造廣惡不修片善命沒之後勒入二十四獄依法考罪

- 第一曰監天地獄 第二曰平天地獄
- 第三曰九天地獄 第四曰律令地獄
- 第五曰清冷地獄 第六曰无量地獄
- 第七曰太真地獄 第八曰三六地獄
- 第九曰天乙地獄 第十曰黑劫地獄
- 第十一女青地獄 第十二拷掠地獄
- 第十三刀山地獄 第十四劔樹地獄
- 第十五銅柱地獄 第十六勒牀地獄

- 第十七火山地獄 第十八爐炭地獄
  - 第十九銅汁地獄 第二十鋸釘地獄
  - 二十一石碓地獄 二十二寒冰地獄
  - 二十三河伯地獄 二十四熱火地獄
- 天尊言曰世間人民命沒之後男女為修功德請道迎真廣置香華幡像轉經救苦行道設齋方得魂神不經十苦八難地獄之中超離苦海不滯迷途自然解悟次第超沖免歷苦趣一心歸向信受奉行  
元始天尊說酆都滅罪經 終